

Zuekunfts-Beppi.

Schnitzelbank Fastnacht 1921.

1.

Isch das nit e Schnitzelbank?
Jo, das isch e Schnitzelbank!
Dä verzelt eich giftig hit,
Was es nur z'verzelle git.
Wer's nit gärn heert, dä soll ung'steert
Nur heime go und nimme ko.
Mir sin witzig, mängmol spitzig,
Doch mer rede frei und frank.
Ei, du scheene, ei, du scheene,
Ei du scheene Schnitzelbank!

2.

s'Stadttheater will verkrache,
Me sott's drum g'schwind no staatlig mache,
D'r Schnider im Regierigsrot,
Schreit: mer lide grossi Not!
O grossi Not, Regierigsrot!
Dekaschheimgo, bruchschnimmez'ko
Wär's nit gärn heert, dä soll ung'steert
Vo d'r Frau sich heim lo fiehre,
Wie d'r Schnider sich blamiere,
Alles weiss em grosse Dank,
Ei, du scheene Schnitzelbank!

3.

D'r Staat bruucht Gäld, es isch e Schand,
Und drumm bestiirt er allerhand.
Nit emol s'Billet kasch ha,
Es hängt e Stürbifähl hit dra.
Im Referändum däm goht's ganz krumm.
O grossi Not, Regierigsrot!
Wär's uns nit glaubt, däm isch's erlaubt
Go die falsche Zedel z'zelle,
Aer wird's gli uffstecke welle.
Alles weiss em grosse Dank,
Ei, du scheene Schnitzelbank!

4.

D'r Omnibus der Hermandat
Dä fahrt voll Stolz durch unsri Stadt.
Doch vom grosse Gaunerdruck
Kriegt si Achse bald e Buck.
E beese Buck vom Gaunerdruck,
Wie's Referändum, es goht em ganz krumm.
O grossi Not, Regierigsrot!
Und wär's het gseh, däm tuet's no weh,
Dass die Pensionär mien laufe,
D'Polizei mit Nämme taufe.
G'schwore hän sie halt zuem Dank,
Ei, du scheene Schnitzelbank!

5.

Wie-n-e Firscht per erschti Klass,
Vo London kunn e grosse G'schpass.
Im Dreikenig wohnt dä Knab.
Die ganzi Stadt lauft d'Knoche ab.
E hochi Ehr! E Redaktör,
Dä kriegt e Buck vom Gaunerdruck,
Wie's Referändum, es goht em ganz krumm,
O grossi Not, Regierigsrot!
Wär isch's denn gsi? So frogt me gli.
Wär hett ächt so viel Bidittig?
Sicher numme d'Nazzi-Zitig!
Ihre g'heert d'r ganzi Dank.
Ei, du scheene Schnitzelbank.

6.

Alles will sich uusstaffiere,
Drum tuet me d'Scheenheit au prämiere,
Bi d'r grosse Konkurränz,
Zaigt me's Wib und sini Tänz.
Me ka do b'schäue die scheenste Fraue,
E grossi Ehr, e Redaktör,
Kriegt fascht e Buck, vom z'feschte Druck,
Wie's Referändum, es goht em ganz krumm,
O grossi Not, Regierigsrot!
Du luegsch däm zue und furt isch d'Rueh
Bi alle Männer sither hitte,
Jede tuet dehaime schritte,
Denn sie Frau isch nit so schlank,
Ei, du scheene Schnitzelbank.

7.

D'Schtadt, die het e Kunscht-Kredit.
D'r Moler molt au was de witt.
Ohni Klaider in der Sunne,
D'tanzt d'Salome bim Spalebrunne.
Naturgetrei isch d'Schmuserei,
Me ka do b'schäue, Buebe, Fraue,
E hochi Ehr, e Redaktör,
Kriegt fascht e Buck, vom grosse Druck,
Wie's Referändum, es goht em ganz krumm.
O grossi Not, Regierigsrot!
S'macht jede Ma z'hirote'n-a.
Alli wetze-n-ihri Schnäbel,
Ganz verlore mit dem Säbel
Wacht die Jumpfere bleich und krank.
Ei, du scheene Schnitzelbank!

8.

E Basler Zitig will plagiere,
Damit viel Liit si abonniere.
Si maint, sie kennt d'r Hushalt rette,
Und lost g'schwind alli G'lehrte wette:
Wie soll me's mache nit z'verkrache,
Naturgetrei isch's ganzi G'schrei.
Me ka do b'schäue Männer, Fraue,
Herr Redaktör, s'isch nit zur Ehr!
Däm beese Buck hilft halt kai Druck.
Wie's Referändum, es goht em ganz krumm.
O grossi Not, Regierigsrot!
Sogar d'Nochrichte, muess halt verzichte.
En-ander mol wottsch's blibe loh,
Denn uff d'r Liim will kaine goh.
Das sage mir dir frei und frank,
Ei, du scheene Schnitzelbank!

9.

Alles Bees nimmt iberhand
Und b'schummle tuet me's Schwizerland!
s'Platzkommando sitzt im Drägg
Drum hängt me d'Fahne gschwind ewägg.
Noch all däm Schufte, tuet's verdufte.
Wie soll me's mache? s'isch nit zum lache.
Naturgetrei isch d'Gauerei,
Me ka's go b'schäue, doch s'tuet aim graue.
Es fällt aim schwär, es isch kai Ehr.
E beese Buck, e schlimme Druck.
Wie's Referändum, es goht em ganz krumm;
O grossi Not, Regierigsrot!
Die alti Gschicht; d'r Beesewicht
Ka verschwinde, hinderebinde
Tuet me nur d'r klaini Schelm.
D'r gross, dä weiss eich alle Dank.
Ei, du scheene Schnitzelbank.

10.

D'r meishti Stolz isch uns d'Marine,
Doch mer fliege gheerig ihne!
Stait em Zucker, uff dä mer warte,
Verschwindet's Gäld uff alli Arte.
Es sott sich lohne, doch die Millione
Nach all däm Schufte, tien si verdufte.
Wie soll me's mache, s'isch nit zum lache!
Naturgetrei isch d'Gauerei.
Me ka's go b'schäue, doch s'tuet aim graue.
Herr Redaktör, es isch kai Ehr!
E beese Buck, e schlimme Druck!
Wie's Referändum, es goht em ganz krumm!
Regierigsrot, di grossi Not
Verlaidet aim, drum gehn mer haim!
Sunscht wird unser Lied no z'lang
Us sind d'Helge, us der G'sang.
Ei du scheene, ei du scheene,